

陶雲汀先生奏疏

奏摺卷十九目錄

撫蘇稿

安化陶

護送朝鮮國夷人進京摺子

訪獲訟棍請

旨飭拏在京攬訟各犯摺子 附片一件

查覆南滙已結京控及未結各案摺子

查覆漕案摺子 附片二件

三次清查案內續歸無著銀款請照常例辦理

摺子

籌備挑濬吳淞江銀款摺子 總督會稿

附奏拏獲隣省巨匪摺片

酌議新漕海運摺子

總督會稿
附片一件

查明辦賑及收養災民出力人員請加獎勵摺

子

總督會稿
附清單

護送朝鮮國夷人進京摺子

奏爲朝鮮國夷人漂收江境循案護送

回國恭摺奏

聞事據代理東臺縣知縣朱勃詳據富安司巡檢徐
聯成申報道光七年四月初二日巡兵查遇外
夷四名隨飭護送至城查訊言語不通給與紙
筆令其書寫據書係高閑祿朝鮮國全羅道靈
巖縣人於本年三月十五日同水手李德春金
清雲夫德元一共四人乘船裝載松木赴本國
濟州販賣於三月三十日猝遇颶風松木及一

切器物均已漂失船隻漂浮到此求請護送回國等語由縣詳報並將該難夷高閑祿等四人護送到蘇臣卽飭優給口糧妥爲安頓一面譯詢供情去後今據臬司覺羅慶善會同江寧藩司張志緒蘇州藩司梁章鉅詳稱朝鮮國難夷高閑祿李德春金清雲夫德元等四人俱係朝鮮國靈巖縣人氏裝載松木赴本國濟州販賣猝遇颶風松木及船內器物均已漂失船隻漂至東臺縣境內請將原船照東臺縣估價錢二十千三百文先爲墊給再行酌助資斧循照向

例委員護送進京遣歸本國詳請核

奏前來

臣

查嘉慶二十三年東臺縣境曾有朝鮮

難夷金丁宅等漂收抵境係護送至京遣回該國現在該難夷高閑祿等漂收到境核與前案情事相同自應循照辦理現在時已仲夏天氣漸熱當卽飭備夏布衣褲並飭該司等將夷船變價錢文同酌給資助銀兩交給該夷人等收領卽日委員護送進京附搭回國以仰副

聖主懷柔遠人之至意除咨會沿途督撫臣一體支應撥護並咨明禮兵各部查照遣令歸國外所

有朝鮮國難夷抵境循案辦理緣由謹會同兩

江總督臣琦善恭摺具

奏伏乞

皇上聖鑒謹

奏

道光七年閏五月十一日具

奏六月十二日奉到

硃批禮部知道欽此

訪獲訟棍請

旨飭拿在京攬訟各犯摺子

附片一件

奏爲訪獲勾結攬訟各棍徒併究出在京包攬遞
呈各犯請

旨飭拿歸案審辦事竊查近來京控省控各案往往
情節甚微而橫生枝節牽累多人一經質訊明
確多屬無辜問之原告又似非其本意臣細加

察訪竟係藉訟拖累冀圖訛索其中搭擡構覺
包攬主唆皆所不免亟應嚴拿以清訟源當諭
臬司慶善遴委幹員密訪旋據蘇州府陳鑾稟

稱訪有南匯縣監生葉墉在省開張客寓招集
訟師包攬申訟隨會督委員通判徵良縣丞常
恩等將葉墉及葉朝奎張金照周裕聲張秀王
二趙徵王雪堂等先後拿獲到案併搜出詞底
稿簿及搆訟書信各件訊據葉朝奎供葉墉係
其堂弟在省以開店爲名專攬詞訟延請浙江
石門縣監生張金照上海縣文生趙徵及王雪
堂等商做詞狀張金照住近葉墉臥房從竈邊
出入不輕出外凡有南匯人告狀皆葉墉等經
手伊在店寫賬知有鍾振聲張壽昌孫幅珍杜

觀成於二月間同時進京告狀曾經葉墉信囑在京包攬遞呈之金老四照應金老四帶領鍾振聲等至李玉山家居住商量分起遞呈又有京控之洪敘山併上控學院衙門之朱攀桂等及上海人梅信昌訟事亦係葉墉包辦每案得受洋錢多少不等張壽昌鍾振聲洪敘山呈詞係王雪堂所做孫惻珍杜觀成梅信昌呈詞係張金照所做葉墉詐得銀錢與趙徵等分用等語質之帮工張秀王二俱供葉墉包訟屬實並據周裕聲供稱伊因與女婿互控投託葉墉詐

爲包辦因其索取洋錢過多伊給錢太少被葉
墉冒罵攆逐未及搬寓被獲提訊王雪堂供認
改做詞稿屬實前有吳柳溪到寓言及京控案
件多在葉墉處等語惟葉墉張金照趙徵現尙
恃符狡展不肯吐實請一併革審等情臣查葉
墉係前次審結京控案內之人此次鍾振聲孫
綱珍張壽昌及杜觀成等陸續京控均籍隸南
匯以同路進京之四人分作四起控告其實俱
係葉墉包攬指使無怪前後呈控情詞如出一
手現在其兄葉朝奎供詞確鑿同案諸人亦供

葉墉攬訟屬實查閱搜出簿內抄載道光六年七月十七日御史李逢辰條奏京控蠹吏重徵苛斂欽奉

上諭一道又載戶部則例災蠲一條其餘多係呈底又書信數件內有云與楊姓不合亦欲相幫詞意顯與該縣作對扛幫訐告而張金照行篋所藏信稿皆影響暗昧之語就其文理可識者多係構串訟事有云以前涉手仇怨沸騰莫如暗中別事報他高樓看戰馬不傷脾胃使渠自顧不暇其結放鬆此古今訐訟第一上著也又云

商通辦理一則擒得繳錢二則借刀殺人不傷
情面又云暗使請一場官司與他喫不妨起起
花頭伊必令張二老尋你你格外殷勤可延宕
日期與他辨明如在神威矣又云趙大叔來云
邇來精力不濟恍惚異常今歲僅動筆你處兩
紙餘不涉手意欲退避坐館閱初八日批論起
來該落訴呈再上控敲足恐押抱人不敢涉手
又云一辨必訪一訪必審又云險連我帶在其
內幸用硬工撤掉又云日後遠颺別處有何親
情面目等語觀此數信其陰謀播弄暗地唆訟

及上控作詞之法均已直言不諱又慮訪押審訊預謀遠颺鬼域情形歷歷如繪明係一夥訟棍內外勾通串唆圖詐以致控案絡繹拖累無辜大爲地方之害若不嚴拿重辦無以息刁風而安良善除將葉墉等分別咨革究審外查常州府通判徵良崑山縣縣丞常恩精明幹練遇事出力此案係該二員設法訪獲現仍責令隨同該府緝拿逸犯確訊究辦所有緝拿未獲之金老四李玉山二犯究出現住京城及通州地方相應請

旨飭下步軍統領五城及順天府訪拿務獲解蘇歸
案審辦以期水落石出理合繕摺具

奏伏乞

皇上聖鑒謹

奏

道光七年閏五月十九日具

奏六月二十三日奉到

硃批所辦甚屬可嘉另有諭旨欽此

再李玉山金老四係案內緊要犯證現訊葉朝
奎據稱金老四曾跟隨通州小河口姓盛木行
杜贊傑現住北通州城隍廟大街呂公道荷包
店間壁李玉山住在都城前門內三眼衛衙門
首貼有金聲堂字樣左鄰係膏藥店右鄰係雜
貨店對門係小刀店附近衙門似係兵部又似
刑部記憶不清等語合併附片聲明請

旨

道光七年閏五月十九日附

奏六月二十三日奉到

殊批另有旨欽此同日奉到道光七年六月初五日

內閣奉

上諭陶澍奏訪獲勾結攬訟棍徒並突出在京包攬遞呈各犯請飭拏審辦一摺近年京控各案往往情節甚微橫生枝節牽累多人竟係訟棍藉案播弄經該撫密訪將積年包攬之葉墉等拏獲革審搜出詞底稿簿及構訟書信各件所辦甚屬可嘉並供出現在京城及通州地方居住之金老四李玉山二犯內外勾通串唆圖詐此而不嚴行懲辦何以息訟源而靖刁風著步軍統領衙門五城及

順天府按照該撫單開各犯住址一體密速掩捕
務獲解往江蘇歸案嚴辦毋任遠颺漏網欽此

查覆南漕已結京控及未結各案摺子

奏爲查明已結京控及現辦未結各案情形先行
恭摺覆

奏仰祈

聖鑒事竊臣接奉

廷寄道光七年四月二十三日奉

上諭本日都察院奏江蘇南漕縣監生凌培賢遣抱
告凌占盛呈控該縣漕書沈念會石蘭田等尅減
災蠲分數勒折錢糧漕米復據民人王慕祥呈稱
嘉慶二十五年至道光元年伊承充地保圖內應

完條漕均係捆墊並勒收票張錢文又民人馬瑞堂以伊兄馬東生充當地保領催錢漕漕書朱超宗沈念會等勒墊漕米條銀及票張錢文變產賠納伊兄控經藩司批交府縣查究該漕書囑差陳文玉等將伊鎖拏並奪去洋銀受責各等情已明降諭旨交該撫親提審辦矣江蘇省屢有控告錢漕之案上年四月至本年三月該縣民人華鳳岐等呈控浮收勒折者共有六案之多均經咨交該撫審訊此次監生凌培賢等復以漕書沈念會等剋減成災分數浮折錢漕並違禁勒令地保捆墊

錢糧漕米以致家產蕩然是該縣漕書種種舞弊
病民藐法已極著該撫親提人証卷宗秉公查訊
按律定擬具奏無得預存成見致令積蠹殃民將
此諭令知之欽此 臣查前次京控咨交案內原告
華鳳岐曾充地保因其保夥計元升侵用花戶
錢糧被差盛茂催追卽控墊完又有徐承國亦
充保正因其幫夥陸啟章挪用錢文捏稱係朱
超宗等勒墊條銀用去牽砌具告又有王起鳳
先充地保曾侵收朱天勝等漕米被張以義舉
充之地保徐贊候查出稟追因而挾嫌唆使徐

年貞誣告張以義逼斃人命加等擬徒限滿遞
回王起鳳圖翻前案轉控張以義包漕浮折以
上三案均經提省審係捏誣分別擬結咨准部
覆尙有孫炯珍鍾振聲張壽昌京控三起甫經
准咨核其控詞俱屬捆墊浮勒等事茲又據凌
培賢等以前情具告如果屬實該縣漕書捆勒
殃民大干法紀亟應澈底根究盡法懲治當經
行司分案嚴提一面密諭松江府確查捆墊情
形去後茲據該府李景嶧查得該縣花戶共計
一百五十六圖圖以束計又稱爲捆郡志載乾

隆四十年間南滙縣開河舊案卽有十六保十
九保二十一保之人計圖分捆計畝出夫之文
捆之名目由來已久本係里下分圖聚戶之謂
並非威力制縛之意該縣舊章每屆啟徵錢漕
頒發易知由單歸於地保散給按田之多寡分
爲數捆以田多之戶領田少之戶挨年輪當互
相檢查勿使侵蝕名曰捆業若輪值生監則倩
人代辦已復從中查察嗣因糧戶或離城寫遠
或出外謀生往往將應納銀米托保代完遂有
奸保劣衿串收侵抗及該縣提比嚴追書差據

實查出該保等無計掩飾卽巧借名色指爲捆
墊浮勒砌詞控告前結地保華鳳岐等案卽其
明證等情伏思前定輪捆充保之法本以稽查
侵欠於催科實有裨益今行之久遠竊恐良法
漸成流弊或保正從而侵盜或書役藉此擾民
轉至積欠日增控案日甚且現控之孫惻珍及
王慕祥等多係地保其所稱墊完各戶皆有主
名定例花戶欠糧應行治罪當時孫惻珍等不
難指名稟究何以匿不舉報遽肯隱忍賠墊此
中情由均應推鞠臣俟提集人證惟有逐細根

追使之水落石出實究虛坐以儆積蠹而懲刁
抗斷不敢稍存成見仰副

誥誠諄諄之至意合將查辦緣由先行恭摺覆

奏伏乞

皇上聖鑒謹

奏

道光七年閏五月十九日具

奏六月二十三日奉到

硃批總要細心秉公慎之欽此

查覆漕案摺子 附片二件

奏爲遵

旨查訊太倉鎮洋青浦等州縣並無漕書蓄養打手
專毆控漕生監之事據實覆

奏仰祈

聖鑒事案查本年二月承准軍機大臣字寄奉

上諭辛從益奏漕務積弊情形一摺該學政奏稱近
日太倉鎮洋青浦紳士各公呈漕書蓄養打手專
毆控漕之人恐亦不盡無因著該撫嚴行查訪隨
時究辦等因欽此 臣查州縣收漕遵照歷年成規

辦理如果刁抗之徒包攬索規藉端滋鬧不難
治以官法豈容縱令漕書肆行毆辱自應嚴訊
究辦檢查歷年控漕案卷並無呈告完漕被毆
之案惟上年七月內有太倉州職員俞世英等
以請禁太倉鎮洋書役私行毒毆等情赴學政
衙門具控經學臣辛從益批飭以紳士等事不
干已聯名具呈蹟類扛幫咨臣委員查辦當經
臣飭行兩司秉公查訊隨據詳稱按照原呈內
牽涉情節逐細查明或係本無控案或係已結
詳銷均無實據並據委員等查覆相同經臣咨

覆學臣在案又上年十一月內准學臣咨據青

浦縣貢監胡道怡等呈請飭禁書役毆辱生監等情一案亦卽飭司查禁並令將指出之漕書蔡錕標飭縣先行斥革解省歸案訊明究辦亦在案茲蒙

聖諭指示臣恐先後查訊各情尙有不實不盡復飭提兩案應訊人証及各原呈等來省札委兩司督同蘇州府知府陳鑿候補知縣李鴻鈞虛衷研鞫毋許稍涉偏徇去後現據藩司梁章鉅臬司覺羅慶善詳稱提訊該州縣漕書吳誠等並

無蓄養拳勇之事質之俞世英等僉稱誤聞有完漕被毆之事實未暇見亦不能指出憑據自認冒昧具結詳銷前來臣以俞世英等公呈內稱有監生陸濞被鎮洋漕書毆辱並稱拳勇毆人有隔年傷三年傷等名目監生王寶文于道光二年三月被毆延至五年六月傷發身死文生王之楨於四年被毆回家身故事關人命情節重大何以當時屍屬並不報驗訊究迄今已久始據該職員等從旁援爲訟柄而又不赴地方官控告據所牽列事在數年以前於現任人

員無涉無庸迴護復飭委員提省諭令俞世英等據實指出以憑究辦反復駁審該原呈等毫無指証均稱王寶文王之楨實係病故懇求矜全等語其陸鏊兄弟係太倉監生並無鎮洋應完錢漕所稱經過倉外被毆不能指出毆係何人至胡道怡等所呈亦據該委員等確訊詳覆盡屬子虛伏查太倉州鎮洋縣職員俞世英青浦縣生監胡道怡等以事不干己摭拾浮言先後聯名具呈難保非串通扛幫挾制以爲需索漕規地步本應究辦姑念到案卽行供明堅稱

並非有心誣捏從寬免其置議俾子自新吳誠
訊無毆人情事惟查其平日不善辦公業已另
札斥革亦毋庸議臣惟有欽遵

諭旨隨時隨地據實稽查無許蠹役稍滋事端按照
收漕成規毋得格外苛浮亦不容生監包攬刁
抗藉端需索以清漕務而息訟紛所有查訊俞
世英等各案緣由謹繕摺覆

奏伏乞

皇上聖鑒謹

奏

道光七年閏五月二十日具

奏六月二十三日奉到

硃批所奏知道了秉公勉力爲之欽此

再臣查學臣所陳漕務情形原係泛論並無指實惟所稱拳勇毆人一節指明太倉鎮洋青浦等處紳士連名具控如果屬實必須嚴查重辦俾資整飭茲經一一訊明仍係無情之詞藉端捏控卽如詞內所列王寶文王之楨二案均關人命重情而當時屍親何以不控保長何以不報其無情一也不報不控而里鄰亦無聞見兇手亦未畏避其無情二也不控於屍親而控於毫不相涉之職監且不控於登時而控於數年之後其無情三也刑名重案例須檢驗不控於

有司不控於督撫而控於不理刑名無案可查
之學政衙門其無情四也定例傷痕最重保辜
或二十日或三十日極重之傷加以餘限至七
十日爲止今據稱王寶文以道光二年被毆至
五年六月傷發身死卽照保辜亦在數年之外
爲律例所不載洗冤錄所未有其無情五也此
等呈詞不待識者而知其僞卽學臣原批亦以
迹類扛幫駁斥矣乃復據以爲言未免自相矛
盾又學臣言告漕之人必實有頑抗乃予押追
今一例發回押追地方官恨其上控倍加抑勒

仍科以抗糧之罪等語查良民負屈求伸與刁徒藉端捏告名同而實異其間或一畝全無而妄稱捐勒或升斗未交而遽行騫控或一人而包攬至數十戶或一控而匿不赴審此等伎倆無非以控爲抗藉訟分肥與良民之控漕者各別臣前摺聲明謂必須查其是否糧戶有無抗欠正學臣所謂實有頑抗並非凡遇告漕者卽行押發也況押發完漕係嘉慶十六年前任督撫通飭舊章不自近日始臣任內押發之案亦不過十之一二並無一例押發之事不知何所

據而云然臣前言刁徒橫索陋規庸劣之員但
仗漕書爲抵禦權旣下移弊更叢出層層挾制
陋規日添勢必取償鄉曲之淳良小戶爲補短
牽長之計以致浮者愈浮苦者愈苦乃此間受
敝之實在情形言之可勝太息而學臣以爲官
吏婪索是其常態縱無此等生監而小民之被
苛徵亦不能爲稍減此正刁生劣監所執爲口
實者殊不思陋規卽出於浮收欲減浮收先裁
陋規實一定之理若逆料有司之不減而謂陋
規可存而不論己非釜底抽薪之計況整頓土

習首嚴義利之辨以主持教化者而爲此論似

非所以訓士也學臣又稱年來生監因漕被革

者多從未聞有漕書獲咎查生監被革或因漕

事或因他案部中有冊可稽計臣兩年來審結

漕案僅革去武生費長春費震雷二名監生朱

心灼一名而漕書則斥革甚多如朱心灼案內

卽革去漕書吉惠嘉蕭永瑞俞蘭言姜佩蘭姜

定符倪顯揆等六名奏咨有案其餘隨案斥革

者不一而足係屬尋常事件例不咨會學政衙

門學臣目所未見宜其詫爲事所未有也學臣

奏藁自明奉

上諭後至今未見移送而外間傳述殆遍正恐刁生
劣監恃以無恐則白規終難盡革而小民之累
無窮甚或釀成事端則所傷實多轉非所以保
全善類伏讀前奉

諭旨此項積弊已久人數衆多當整頓之初怨謗沸
騰甚或糾衆肆鬧捏詞京控勢所必至該撫惟當
不避嫌怨不稍偏徇無庸預存畏葸之見仰見我
皇上鑑空衡平無微不喻一切阻撓牽掣情形早在
聖明洞照之中夫徇衆沽名其勢順而易力挽頽波

殊點

其勢逆而難臣來自田間受

恩深重斷不敢畏難而避怨致令刁風日長民困難
蘇所有遵

旨查訊漕案實在情形合併縷晰附陳謹
奏

道光七年閏五月二十日附

奏六月二十三日奉到

硃批所奏俱悉勉副委任無恤其他欽此

再臣前奏嚴禁衿棍包漕橫索陋規接奉

上諭江蘇漕務疲敝已久閭閻每苦浮收而各州縣用度浩繁不能不藉資津貼抗玩者卽因此挾制以爲控端包攬分肥人數最多之處生監或至三四百名漕規竟有二三萬兩實駭聽聞生監等包攬愈多盤剝併吞勢所不免不釀成巨案不止該撫旣經見及著卽督同藩司將收漕章程體察情形分別酌定毋許浮多並嚴禁道府陋規及掇交幕友長隨一面飭屬遵照兌收衿棍陋規痛行裁革並著移咨學臣一體查察等因欽此嗣於本年

二月內學

臣

辛從益條奏浮收積弊復奉

上諭該撫遵照前旨將收漕章程酌中定制等因伏

思漕務事體重大弊竇多端自水次兌開以至

通倉交卸皆有費用

臣

所言者白規學

臣

所言

者浮收浮收之弊人人能言而不能除正以費

用浩繁而幫費與白規尤其大者幫丁訛索必

以米色爲詞漕棍挾制必以浮收爲詞皆假正

論以行私不遂不休

臣

因漕務費重則收數亦

重其害獨歸於小民是以去歲首請

敕禁幫丁勒索加費次卽禁生監包攬橫索陋規以

冀稍清浮收之根爲補偏救敝不得已之苦衷
今學臣所奏多係正論其所舉浮收諸弊亦與
臣前奏所陳大意相同惟於費用一節一字不
提似非揣本齊末之道古云不患寡而患不均
漕務收數之浮正由不均所致茲蒙

諭旨督同藩司查明歷年收漕章程酌中定制洵屬
持平類一永戢紛爭之至意惟查收漕一節前
於嘉慶年間督撫諸臣屢有八折完漕之議迄
未能行蓋緣年歲之豐歉不齊地方之繁簡亦
異情形未能一例此時酌定收數原爲津貼而

設萬一不肖官吏久且視爲定額而更有所加則作法於涼非整頓之初意且才徒訐告其意不在浮收而在需索即使定爲加二亦無難以加五加六捏詞妄控臣與藩司等細加商榷漕米收數總以費用之多寡爲輕重幫規之外惟包攬與白規最爲漕害凡包攬與白規最多之處其收數自浮如江北各屬此風甚少故收數亦輕江寧及鎮江之徒陽金壇亦然常州則有包攬而白規尙少故收數亦不甚多若蘇屬之常熟昭文已實繁有徒吳江震澤自嘉慶十年

懲辦生監吳景修等三百餘人之後此風稍息
如松江之青浦南匯等處太倉之鎮洋嘉定寶
山等處食規之生監多至數百名且有舉貢在
內銀數動以萬計前經臣奏奉

諭旨飭禁之後卽移咨學臣一體出示曉諭並飭各
屬嚴查蠹書不許入倉其收漕分數一體量減
是以漕務甚急而輸將踴躍於正月望間幫船
掃數開行趕副四月內渡黃

欽限較往年辦漕完竣早至一月有餘此卽革陋規
以減收數之明效方冀陋規果能革盡更可逐

硃圈

硃批

硃圈

漸遞減以卹小民而清漕務嗣後惟有恪遵

聖諭

力加整頓既不使不肖官吏浮勒病民亦不容

所見甚是總要行之以實漸加整頓方好

矜棍把持藉端訐告遇有控案仍查其有無抗

欠。是否糧戶虛實無難立辨。卽予懲治庶幾陋

規可革包攬可息辦漕之費既省收漕之數自

平似不必另議章程轉虞窒礙所有蘇省辦漕

仍循舊章毋庸另定收數緣由合併附片覆

奏伏乞

聖鑒謹

奏

道光七年閏五月二十日附

奏六月二十三日奉到

硃批所奏是隨時秉公認真辦理欽此

三次清查案內續歸無著銀款請照常例辦理
摺子

奏爲三次清查案內續歸無著銀款請照常例辦
理恭摺具

奏仰祈

聖鑒事竊照江蘇省三次清查案內查出叅革病故
家產盡絕及未完外銷無可著追各款江藩司
所屬計有一十七萬六千八百餘兩蘇藩司所
屬計有四十二萬九千七百餘兩當經前撫

臣

韓文綺奏請江寧等屬每年酌提羨餘銀二萬

三千三百兩蘇州等屬每年酌提羨餘銀六萬兩爲彌補之需統限八年歸補清楚旋准部覆准其提補其日後清查各款內追繳無完查明家產盡絕歸於無著籌補之處將來如何籌補應令俟各員追限滿後查明無著銀數多寡妥議專款具奏又續准部咨不得俟統案限滿後彙奏致滋延擱應令卽行

奏明辦理等因當經行司查議去後今據江寧布政使張志緒蘇州布政使梁章鉅議以此項續歸無著銀兩無可籌補若欲再提羨餘不但彌

補無期兼恐徒益新虧事多窒礙請照常例辦理會詳請

奏前來

臣

查三次清查案内前項無著銀兩寧蘇

兩屬共有六十萬六千餘兩之多彼時議令各屬酌提羨餘彌補原因無可補苴不得已而責成於現任州縣其實此款並非現任所虧而現任州縣亦非盡寬然有餘能代前人彌補計此八年之內通省州縣每年提補無著銀多至八萬三千餘兩已屬李代桃僵支持竭蹶况蘇屬州縣每歲除派定捐解及遇事派提各款無論

缺之大小數已浮於應支養廉之外他如差使往來囚犯接遞銅鉛竹木餉鞘等差船隻水脚夫價等項或向例不准開銷或准銷而不敷給發皆須取給於州縣而徒陽運河大小興挑每處貼賠數幾及萬有驛州縣常年賠貼亦需銀三四千至七八千兩不等兼之三次清查以後禁止流攤遇有公用不敷經費無出之事勢不能不由該州縣出貲捐賠至江藩司所屬其一切公務費用賠累與蘇屬大略相同而缺分則更形疲瘠倘以原係有著續歸無著之款仍惟

現任是問不但各省歷屆清查無此辦法且恐名爲節省所出實則剝肉補瘡在庸懦者旋補旋虧仍屬有名無實而不肖者藉詞賸剝轉致遺累編氓是彌補之議再行而官民之困交至矣竊以無著之舊欠不能不籌而續起之新虧亦不能不慮與其窒礙於事後莫若詳審於事先合無仰懇

天恩將清查案內續查家產盡絕無可著追各款銀兩准其照戶部常例辦理庶現任州縣不致再貽彌補之累而此等續歸無著之款亦得隨案

陽學江大生考正和一
三
辦結不致積累難清俾歸核實所有籌議辦理
緣由謹會同兩江總督臣琦善合詞恭摺具
奏伏乞

皇上聖鑒訓示謹

奏

道光七年閏五月二十日具

奏六月二十三日奉到

硃批戶部核議具奏欽此道光七年七月二十八日
准

戶部咨內閣抄出江蘇巡撫陶澍奏江蘇省三

次清查案內續歸無著銀款請照常例辦理一
摺查江蘇三次清查案內查出以前無著各款
計銀六十萬六千餘兩於寧蘇兩屬每年酌提
羨餘銀八萬三千餘兩分限八年彌補全完其
餘有著各款計銀二百萬兩零勒限追繳並議
及日後追繳無完亦歸無著籌補經臣部以將
來如何籌補未據議及奏令該撫俟各員追限
滿後查明銀數多寡妥議具奏嗣因續歸無著
者已有數案又經臣部咨催該撫卽行奏明辦
理在案今據該撫奏稱現任州縣非盡寬然有

餘彌補以前無著銀兩通省州縣每年酌提羨
餘多至八萬三千餘兩已屬支持竭蹶倘以原
係有著續歸無著之款仍惟現任是問恐旋補
旋虧仍屬有名無實請將清查案內續查家產
盡絕無可著追各款准照戶部常例辦理等語
查羨餘銀兩原係州縣辦公節省之餘現每年
已酌提銀八萬三千餘兩自未便再將續報無
著之款復行添入提補致滋重累轉啟挪移賒
削之弊惟是清查應追銀款皆係歷任州縣層
層虧挪所致不加叅辦勒限追繳已邀格外矜

全且追繳無完仍議歸於無著籌補原期

帑項有益今該撫奏請此後無著各款查照常例
辦理查臣部常例應追欠項由歷過任所及各
原旂籍結報並無財產隱寄者准予題豁係指
偶有欠項無可彌補而言與清查各案係一省
數十州縣積虧款項數十萬兩及百餘萬兩者
迥不相同若如該撫所奏將統案應追銀兩一
經結報家產盡絕卽照常例概予題豁是名爲
清查實爲豁免之地現在追完者不及十分之
三將來無著之數尙難窮詰不惟與籌補原議

四
三
不符且恐此例一開各省相率效尤恃有豁免
成案公然肆虧無忌甚或飽其私橐以少虧報
多虧則清查一途轉成推展邀

恩地步必致鉅萬侵挪盡歸虛擲於

帑項大有關係

臣部礙難核辦相應請

旨敕下該撫體察情形將如何分款籌補之處另行
妥議具奏固不可再行派累州縣亦不可使續
報無著之款終歸子虛庶

帑項有裨而清查亦昭核實至彌補以前無著銀
六十萬餘兩除因災分別奏展外其餘仍令按

限如數提清於年終奏報單內分晰開列毋令
含混以致有名無實謹將臣等核議緣由恭摺
具

奏伏乞

皇上訓示施行謹

奏請

旨

道光七年六月二十六日具

奏本日奉

旨依議欽此

籌備挑濬吳淞江銀款摺子

總督會稿

奏爲籌備挑濬吳淞江銀款恭摺具

奏仰祈

聖鑒事竊照蘇省吳淞江自吳江震澤二縣起至上
海縣與黃浦合流之處綿亘二百數十里爲太
湖自西達東正流蘇松太及浙江省之杭嘉湖
六府州屬水利攸關前於道光三年蘇松等屬
雨水成災經前督臣孫玉庭撫臣韓文綺查係
吳淞江等處淤塞所致籌議疏通擇要興挑約
計估需土方等銀四十萬一千餘兩循照三江

水利成案借

帑興辦於捐監銀兩內借動給發分年攤徵還款
嗣因高堰興辦大工集夫不易經前督臣魏元
煜撫臣張師誠議將黃浦下注一路水道估銀
七萬七千二百餘兩之工先爲挑浚其吳淞等
處工段因捐監銀兩續經解部無款可籌

奏准暫停數年俟經費充足有款可借再行勘辦
在案臣陶澍於道光五年六月蒞任遵

旨覆勘黃浦下注挑工時順道詣吳淞周歷勘視沿
江灣曲淺灘節節淤滯當經附片聲明仍應設

法疏挑以利全省未可以經費未充遂爲停歇
復經飭司籌議去後茲據蘇州藩司梁章鉅署
江蘇臬司潘恭常護理蘇松太道陳鑾會詳稱
吳淞江前因淤塞日久議請借項興挑仍於得
沾水利州縣各花戶名下徵還歸款嗣奉部飭
一切工程概行停止緩辦遂爾中止本年五月
藩司梁章鉅因查勘泖湖復赴吳淞江一帶勘
得該處淤墊愈甚必須大加浚治統計數十里
內切灘築岸打壩挑河非照四年分所估銀三
十餘萬兩之數不能有濟當查松江府志載前

明及我

朝康熙年間均係截留江浙兩省折漕銀兩以充挑
浚吳淞江工費現當

國用浩繁之際動

帑固難踵行卽前議借墊攤還而蘇松各屬自道
光三年水災後民間元氣未復近年以來時有
偏災緩徵錢漕新陳並納力已不逮恐借

帑墊辦亦難於攤徵歸款此外又無鉅款可籌兼
查本年新漕欽奉

諭旨仍由海運則吳淞江爲各州縣剝運米石經由

要道尤應趕緊興辦以免繞道黃浦致虞疎失
未便因現當停緩工程期內拘泥貽悞伏查蘇
松常鎮太四府一州漕糧項下應徵贈五及白
糧盤耗運飯等米九萬八千七百餘石河運年
分本係給丁之款上屆米由海運無須給丁節
省存倉當經

奏准糶變每石照時價酌定銀二兩二錢五分共
收米價銀二十二萬二千餘兩解歸道庫報撥
在案來春復辦海運贈五等米亦應歸節省可
否將此項節省米石照案仍請糶變並請將糶

存米價免其報撥作爲挑浚吳淞江經費以海
運節省之米價卽爲挑辦海運剝米河道之用
不但各屬剝船免涉黃浦波濤之險而吳淞江
六十餘里淤墊盡除爲各郡農田收永賴之利
上無損於

帑藏下不累及閭閻且

國計民生理應並重同一節省之款上屆報撥以
裕課今次動用以免徵籌

國籌民兩有裨益雖核照原估挑費尙有未敷仍
可在外籌奏惟前項挑浚工程九十月間必當

及早舉辦而本年節省之米須俟全漕完竣後
截數次年三四月間始能照時價出糶應請先
於本年平糶緩漕米價銀內暫借銀二十餘萬
兩給發領辦以便及時興工仍俟明春將節省
各款米石變價銀兩如數歸款如此一轉移間
要工旣得速舉而民田運道永資利賴等情詳
請具

奏前來臣等伏查吳淞江爲數郡農田蓄洩所資
亦係民商船隻經由要道現辦海運剝船來往
尤關緊要所有挑浚工需自應早爲籌計惟

國家經費有常自未便遽請動款據藩司會同臬司蘇松太道詳請將來年復辦海運案內節省贈五等米照案糶變其糶出價值請免報撥留作挑浚吳淞江經費尙有不敷由外籌措係屬以公濟公並非動用正項錢糧可比惟此項挑浚工程九十月間卽須及早舉辦請先於本年平糶緩漕米價銀內暫借銀二十餘萬兩給發領辦以便及時興工俾得利漕便民相應據實

奏明請

旨施行如蒙

俞允所有暫借緩漕平糶銀兩一俟明春將海運節省各款米石變價出糶立卽歸還正款不致延宕除飭趕緊確勘估計另行

奏報外所有籌備挑浚吳淞江銀款緣由謹合詞
恭摺具

奏伏乞

皇上聖鑒訓示謹

奏

道光七年七月十五日具

奏八月二十日奉到

硃批另有旨欽此又同日奉到道光七年八月初四

日內閣奉

上諭蔣攸銛等奏籌備挑濬吳淞江銀款及時興辦
一摺江蘇省三江水利前曾議准興辦嗣因高堰
興辦大工集夫不易僅將黃浦一路水道先爲挑
浚吳淞各工暫行停辦昨據御史李鵬奏請及早
設法疏濬當經降旨令該督等籌議勘辦茲蔣攸
銛等於未經接奉諭旨之先已議籌款挑濬著照
所請准其將明年辦理海運案內節省蘇松常鎮
太四府一州應徵贈五等米糶變價銀留爲挑濬

經費先於本年平糶緩漕米價銀內借動銀二十餘萬兩及早給發領辦所借銀兩俟明春將海運節省各款米石變價後卽行還款該督等卽遴派道府大員詳勘確估如法疏治務期農田水道實有裨益俟挑工完竣著陶澍親往驗收勿任草率偷減覈實報部查銷欽此

附奏拏獲隣省巨匪摺片

再准徐等屬與河南安徽山東等處毘連向爲
匪徒出沒之所經臣飭屬嚴查前後拏獲梟徒
兇盜三百餘名分起審辨節次附

奏在案上年水災較廣宵小尤易潛踪復經嚴飭
各屬加倍巡防毋稍鬆勁迭據豐縣稟獲黃貝
卜豆等訊係夥劫山東魚臺縣錢店及河南夏
邑縣事主趙學義家案內逸盜贛榆甘泉儀徵
等縣稟獲相洲秦兆彩陳老漢王馨子等訊認
行劫山東諸城縣事主逢九齡安徽天長縣事

主刁延御等家得賊不諱礪山桃源等縣稟獲
王鳳標周禿子等審係銅山甘泉等縣事主劉
玉魁等被劫案內之犯又婁縣稟獲王言大張
秀沅陳四張阿得張泳青水煙阿三等六名訊
據王言大供認夥劫吳江縣事主袁岐昌家併
與張秀沅等迭竊多案質之張秀沅等供亦相
符其水煙阿三係廣西省逃軍曾竊事主沈瑞
芝家贓逾滿貫並據署上元縣縣丞章春奎稟
獲葉加成張二張大小吳張小王二陳二陳老
等八犯併起有刀棍槍頭等械訊認夥劫安徽

蕪湖縣事主徐永謙錢熊得賊逃逸移解上元縣審究犯供狡展解歸蕪湖查辦又據松江府知府李景嶧稟稱訪得積盜顧六夥黨甚盛出沒江浙兩省恣行盜竊查有署婁縣典史舒春元老幹勇健善於緝捕當令改裝易服會同武弁緝至浙江嘉興地方將該犯顧六及首夥蔡阿寶周阿寶擒獲發交婁縣審究等情臣查黃貝等均在鄰省鄰縣犯案一經入境卽據該縣等弋獲其顧六一犯係著名巨匪漏網多年該府等不分畛域遴委幹員踴躍偵緝卒使就擒

陸雲汀先生詩集卷二
兼獲夥犯緝捕尙屬認真當經批飭解歸犯事
各縣分別審辦仍飭實力查拏以期戢暴安良
合將續獲各匪辦理緣由附片以

聞伏乞

聖鑒謹

奏

道光七年七月十五日附

奏八月二十日奉到

硃批所辦甚屬可嘉欽此

酌擬新漕海運摺子

總督會稿
附片一件

奏爲酌擬新漕海運章程恭摺具

奏仰祈

聖鑒事竊照蘇州松江常州鎮江太倉四府一州道

光七年漕白二糧業經

臣

蔣攸銛會同河

臣

奏請仍由海運欽奉

諭旨江蘇省來年新漕除江寧揚州淮安徐州通州
海州等四府二州照舊各歸本幫兌收轉運外其
蘇州松江常州鎮江太倉等四府一州仍雇用海
船運赴天津一切海運事宜除成案可循外此內

如須量爲變通著通盤籌畫定議俟奏到時再降
諭旨等因欽此當經恭錄轉行欽遵出示曉諭各
船商受雇具攬併以來年必須春間一運完竣
以免夏秋風汛靡常致有延悞節次咨明浙江
撫臣示諭三不像船蛋船各商直隸督臣示諭
天津船商一體前赴上海受雇並經咨會奉天
府尹暨直隸山東督撫臣轉飭各關津口岸諭
令江浙出口商船趕緊回南領運去後旋據各
船行稟稱上屆各船商初次領運誠恐抵北交
收或有羈累未免稍存畏難嗣蒙

皇仁體恤優加無不倍深感激今聞仍由海運情願
趕辦船隻備用其糧米到津兌收事宜仍懇悉
照上屆章程辦理等語當經批令該司道剴切
曉諭衆商毋庸顧慮臣等核查上屆海運漕糧
曾蒙

欽派大臣在天津驗收凡有運米船隻到津隨到隨
收毫無阻滯該船商等無不欣感今次海運仰
懇

聖恩屆期仍

欽派大臣驗收其到津兌收事宜悉請循照舊章辦

理至蘇省經理各務間有應須叅酌之處據各司道核議會詳請

奏前來臣等謹就所議悉心酌核分別條款敬陳

御覽

一沙船運送漕糧交代盤量難免折耗應照舊給予耗米也查上屆道光五年海運每漕米一石給耗米八升白糧一石給耗米一斗在於節省例給旗丁應得耗米內動給今次均請循照給發仍有節省給丁餘耗米石一併運津聽候撥用

一商船運米給發水脚等項仍由外籌給也查上屆商船運送糧米無論正耗給子水脚等銀今次應循照舊章由外籌給毋庸請動

帑項並請免其報銷

一天津通倉需用經雜各費應由蘇省籌款解交也查上屆通倉派往天津之經紀人等飯食雜費以及盤量身工各款除將旗丁到通應領銀米等款撥抵外其餘不敷由蘇省籌解分別給發此次天津通倉兩處需用經費已有定數仍應照舊籌撥分別解交濟用以

節

帑藏再查上次海運議恤幫丁係將應支月糧全行給發今次自應照辦惟應否再行量加調劑之處俟將來體察丁力情形另行辦理

一驗米交米仍應專派大員經理也查上屆於上海總滙之地驗收兌裝除總局內派委幹員督率經理外另派丞倅二員於各州縣運米到次時隨同糧巡各道驗兌每船提出樣米裝貯木桶帶津比驗並派道府三員丞倅二員各帶佐雜一員由陸路赴津籌辦收米

事宜今次仍應派員南北分辨並於驗兌米石時公同每船提出樣米一斗裝貯木桶粘貼印花卽交沙船帶津較驗一經兌交剝船卽與沙船無涉其天津交米道府大員及隨帶佐雜應俟臨時酌派所有派往委員應請循照舊章以天津交米爲竣事毋庸再赴通倉庶得各歸專責

一 余山應派武職大員駐劄以資彈壓稽查也
海氛久靖原可無虞而

正供涉歷重洋自宜倍加嚴肅應請於商船放洋

之前先期令蘇松鎮總兵移駐崇明迤東之
柰山督率防護則聲勢旣得聯絡而船行更
臻妥速矣

一海運漕糧宜飭沿海水師會哨巡防也上屆
凡商船經歷洋面欽奉

諭旨飭令直隸山東督撫轉飭沿海水師提鎮各按
汛地多撥哨船分派將弁兵丁巡防護送夜
間於島嶼處所多掛號燈日間多豎號旗俾
商船停泊守風不致迷於所往並經

奏派武職大員二人押坐商船赴津巡防甚爲周

匝此次仍應照辦惟蘇省所委武職大員前次係分兩運是以派委二員今次擬以一運全完祇須專委武職大員一人酌派隨弁於米船放洋時押坐赴津仍於米船定期開行之前派弁先往天津照料

一海運漕糧如有短少霉變及鬆艙等事應分別豁免賠補也查上屆沙船運米如在洋遭風到津時驗有砍桅鬆艙及傷斃人口其短缺米石查照糧船失風之例

奏明免其賠繳並照例優恤倘並無事故而有短

少霉變等弊卽令於備帶餘耗米內如數補足再有不敷勒令買補今次應卽照案辦理如有實係砍桅而並未鬆艙於米石毫無短損者亦應酌量議恤以示區別

一商船獎敘宜酌量分別也查上屆海運商船運米一萬石至五萬石以上均經

奏請獎敘其運米一萬石以下者在外賞給匾額原屬鼓勵商人之至意但上屆事屬創始今擬量加覈實凡上次運米一萬石以上已沐恩獎者此次須每萬石再加米五千石以次遞加准

照上次遞遞議敘若上次已加至五品職銜者准其另給子姪如有新商攬運米石自一萬石以上至五萬石者仍照舊章請獎一萬石以下者仍在外給匾以昭限制

一商船不准攬帶客貨如有自帶零星土宜應查明仍准免稅也查上屆海運各船准其帶貨二成由海關查明免稅放行關東裝豆回南仍照例輸稅惟沙船攬載客貨客商議給水腳其沿途關稅卽包納在內是稅銀本出於客商免稅獲利與船商無涉今次漕糧現

擬一運完竣自應儘數裝米不准再帶客貨如船商自帶零星土宜核實查明不及一成者仍准其免稅以示體恤

一通倉席竹二項仍請折銀購辦也查通倉所需蘆席毛竹二項例由糧道動項給發幫丁買帶交倉上屆海運因恐未能合用奏明由蘇省折銀解赴倉場衙門酌量購買今次請仍由舊章俟核定銀數解北購辦

一漕白糧米自津運至通倉宜加慎遮蓋查禁攙水併令各經紀親自押運到通交納以免

霉變而專責成也查上次海運米石到津節
准驗米大臣咨會米色乾潔奏明在案嗣聞
到通之後間有霉變不能久貯總因自津剝
運日曝雨淋到通之後經紀人等又不免攙
水偷漏之弊是以入倉不無霉變此次運米
到津應請責成通倉經紀人等於剝船多用
蘆席遮蓋不使日曬雨淋並嚴禁攙水偷漏
仍令各經紀親自押運到通交納以專責成
而昭慎重

以上各條臣等往返商酌意見相同此外如尙

有應行奏咨事宜容隨時陸續辦理謹合詞恭

摺具

奏是否有當伏乞

皇上聖鑒訓示謹

奏

道光七年八月初三日具

奏九月初六日奉到

硃批另有旨欽此又同日奉到道光七年八月十九

日內閣奉

上諭蔣攸銛等奏酌議新漕海運章程一摺前據蔣

攸鈺等奏稱來年漕務議請將蘇州松江常州鎮江太倉等四府一州新漕俱雇用海船運赴天津以免貽悞當經降旨准行茲據該督等查照上屆章程間有叅酌之處分別條款具奏著照所議務須妥爲經理勿致臨時周章至海船運米到津屆期仍著軍機大臣奏請欽派大臣一二員前往查驗一切兌收事宜悉照舊章辦理欽此

再海運以船隻爲第一要件現據署上海道陳
鑾稟報已據江浙各船商投具承攬共船一千
一百六隻約可裝米一百三十餘萬石良由上
屆各船商渥被

恩施無不同深感奮故一經示諭羣情踴躍核計現
在具攬船隻已可裝全漕米三分之二此後陸
續招攬務期一運完竣現委蘇藩司梁章鉅親
赴上海曉諭查驗合併附片以

聞伏乞

聖鑒謹

奏

道光七年八月初三日附

奏九月初六日奉到

硃批知道了欽此

查明辦賑及收養災民出力人員請加獎勵摺

子附清單
總督會稿

奏爲遵

旨查明辦理賑務及收養災民勞績最著人員懇

恩獎勵仰祈

聖鑒事竊照道光六年江寧淮安揚州徐州海州等

府州屬被水成災經臣陶澍會同前督臣琦善

迭次具

奏仰荷

天恩普加賑卹蠲緩兼施其出外謀食災民經各地

方官隨時收養並蒙

諭旨准撥留南糶變及徵存緩漕各米石減價平糶
俾資接濟俟田廬涸復資送回籍

臣

陶澍仰體

聖主子惠元元至意於查災之初卽指陳積弊議定
章程諄諭各屬倍矢天良實心經理毋稍遺濫
併遴派委員分赴各處幫同照料因被災較重
辦賑較難誠恐各州縣藉口賠累復與督

臣率

同藩臬道府州廳共捐廉銀三萬餘兩分撥災
區作爲辦賑公費以絕浮冒尅扣之源其揚州
府城切近災區災民絡繹經兩淮鹽政

臣

張青

選勸諭淮商捐銀四萬兩派員會同該府縣設
法資給至江寧蘇州等處災民往來尤多經知
府加道銜陳鑾首先議請分派各屬收養以散
其勢兼得多展時日鎮江松江常州太倉等處
咸經照辦凡有江北淮揚等處飢民抵境隨卽
設局留養所需經費由該府州縣分別籌捐其
減價米石亦卽就各境糶出濟用統計自上年
秋間至本年夏月閱時半載有餘在事各員皆
知認真出力潔己宣勤當被災之初聞壩齊開
雨水交灌田廬淹沒據該府等稟查自高寶興

化至鹽城阜寧一帶縱橫五六百里汪洋若浸
無可駐足災民數十萬同時失業紛紛出避大
江以南各府或一日而來災口數千並有遠赴
江廣各省者臣陶澍親詣履勘不勝凜惻當卽
會同前督臣顯蒙

恩旨撫卹旋飭各屬酌數收養人心始定叠荷

鴻施還定安輯民情救貼入春以來翻犁播種場雨

勻調

臣

蔣攸銛到任復嚴飭河員謹守閘壩洩

水歸江毋許灌浸運河以東各境致傷禾稼現
在早稻全收中晚稻亦極豐茂不日就刈以百

餘年未有之災地廣人衆悉獲安全莫不感頌
皇仁同登祗席伏查嘉慶十九年道光三年查辦災
務出力各員俱經

奏請獎勵上年十一月臣陶澍備陳災務積弊及
查辦情形欽奉

上諭該員等如果經理得當自應加以鼓勵等因欽
此所有此次辦理賑務及收養事宜印委各官
大小百數十員現已妥貼歲事毫無貽悞固不
敢濫登薦牘亦未便泯沒其勞據江寧蘇州兩
藩司擇其平日官聲素好才具出衆而辦賑及

收養災民尤爲出力者開單詳請保

奏前來臣等核覆無異謹會同繕具事蹟清單恭

呈

御覽可否仰懇

天恩量予鼓勵之處出自

聖裁再此次被災較廣員數較多尙有印委各員應
分別咨部議敘由外記功其董辦捐賑及樂輸
各紳商亦應酌量獎勵容臣等飭司查明循例
分別奏咨合併陳明伏乞

皇上聖鑒訓示謹

奏

道光七年八月初三日具

奏九月初六日奉到

硃批另有旨欽此

謹將江北各屬辦理災務及江南各屬收養災民出力各員開單註明實蹟恭呈

御覽

高郵州知州李宗穎淮安府通判加同知銜田銳江都縣知縣加知州銜伍家榕調任江陰縣前寶應縣知縣葉維庚

查此次水災高寶一帶首被淹浸淮安揚州南北衝要該員李宗穎辦災最先頗知愛民措置章程均臻妥善田銳稽查災口彈壓土棍襄辦悉屬認真伍家榕經營本境賑務兼

附錄 卷之六
至
養外來災民綜理咸宜葉維庚辦災允愜於
資送回籍流民尤能核實以上四員均請以
同知直隸州陞用

上元縣知縣王文炳吳縣知縣李國瑞餘東場
鹽大使黃冕甘泉縣訓導李溟

查此次被災較廣災民四散各屬留養資送
據江寧府先後稟計二萬餘人蘇州府計四
萬三千餘人常州松江兩府各五六千人鎮
江府屬之丹徒縣計八萬五千五百餘人揚
州府屬之儀徵縣計四萬五千八百餘人此

外多寡不一其收養之局逾半年之久籌捐
措用並未請

帑較之被災各區雖情形稍異而勞績相同王
文炳李國瑞地居省會留養最先經理極善
平時審案辦公亦能盡心著有實蹟黃冕先
經隨同勘辦撫卹旋赴災廠料理收養並於
鎮江挑河催漕案內曾經出力李溟幫辦揚
州賑務及收養各局不避辛勤災民帖服以
上四員尤爲出力王文炳李國瑞黃冕均請
以應陞之缺陞用李溟本係舉班揀選知縣

請照議敘知縣例歸部儘先選用

長洲縣主簿李述三元和縣主簿宋學祁丹徒
縣高家司巡檢莫如栢上元縣典史李德純江
寧縣典史姚城丹徒縣典史諸鳳丹

以上六員俱係微員派委留養最多之處人
繁且雜每日監放口糧均有條理自始至終
克臻妥協李述三宋學祁李德純均請以應
陞之缺陞用莫如栢姚城諸鳳丹係曾經俸
滿保薦人員均請以應陞之缺儘先陞用

加道銜蘇州府知府陳鑿候陞道員淮安府知

府富斌松江府知府李景暉揚州府知府黃在厚邳州知州李正鼎候補鹽運判倪啟祥謝宗顯江寧縣知縣姚樑山陽縣知縣譚霖調補阜寧縣前東臺縣知縣孫世藻鹽城縣知縣臧新芝長洲縣知縣王錫蒲元和縣知縣何士祁沐陽縣縣丞秦頤齡

以上各員陳鑾先經隨同勘辦撫卹旋於署江寧府任內見災民絡繹首請設局留養各屬照辦全活較多富斌黃在厚督辦賑卹均臻允協其餘各員或經理災務或收養流民

克盡心力均請交部從優議敘

大挑試用知縣景壽春河工試用知縣湯譽光
候補府經歷王錯候補縣丞孫琬

以上四員派委各屬幫辦災務勤奮認真尤
爲出色景壽春王錯孫琬請各照本班儘先
補用湯譽光係大挑分發南河試用知縣勤
於民事請改歸江蘇地方入於大挑知縣班
儘先補用

道光七年八月十九日內閣奉

上諭蔣攸銛等奏查明辦理賑務及收養災民各員

懇恩獎勵一摺上年江蘇省江寧等府州屬被水成災較重經陶澍議定章程設局收養派員分投照料均能悉心經理俾災黎咸獲安全洵屬認真出力茲據該督等查明開單懇予恩施著照所請江蘇高郵州知州李宗穎淮安府通判加同知銜田銳江都縣知縣加知州銜伍家榕調任江陰縣前寶應縣知縣葉維庚俱著以同知直隸州陞用上元縣知縣王文炳吳縣知縣李國瑞餘東場鹽大使黃冕俱著以應陞之缺陞用甘泉縣訓導李溟係舉班揀選知縣著照議敘知縣例歸部儘先

選用長洲縣主簿李述三元和縣主簿宋學祁上
元縣典史李德純俱著以應陞之缺陞用丹徒縣
高家司巡檢莫如栢江寧縣典史姚城丹徒縣典
史諸鳳丹俱著以應陞之缺儘先陞用加道銜蘇
州府知府陳鑿候陞道員淮安府知府富斌松江
府知府李景嶧揚州府知府黃在厚邳州知州李
正鼎候補鹽運判倪啟祥謝宗顯江寧縣知縣姚
樑山陽縣知縣譚霖調補阜寧縣前東臺縣知縣
孫世藻鹽城縣知縣臧新芝長洲縣知縣王錫蒲
元和縣知縣何士祁沐陽縣縣丞秦頤齡俱著交

部從優議敘大挑試用知縣景壽春候補府經歷
王鎔候補縣丞孫琬俱著照本班儘先補用河工
試用知縣湯譽光著改歸江蘇地方入於大挑知
縣班儘先補用以示鼓勵該部知道欽此